

ديوان
شعر
بالعامية

MISSING

محدث مشاف وطن!

علي سلامة



محدث شاف وطن!

صورتك أكبر بكثير م البرواز الصغير ...
خوفي كام مرة لون الاوضة اتغير ...
ورحمتك له فيها ...



للطلب والاستفسار اتصل على

16766

www.nahdetmisr.com
our page/nahdet misr group



أشعار بالعامية

محدث شاف وطن!

علي سلامة



العنوان:
محدثى شاف وطن!

تأليف:
علي سلامة

إشراف عام:
داليا محمد إبراهيم

جميع الحقوق محفوظة © للدار نهضة مصر للنشر

يحظر طبع أو نشر أو تصوير أو تخزين
أي جزء من هذا الكتاب بابه وسيله إلكترونيه أو ميكانيكيه
أو بالتصوير أو خلاف ذلك إلا بإذن كتابي صريح من الناشر.

الترقيم الدولي: 978-977-14-4636-1
رقم الإيداع: 2013 / 20116
الطبعة الأولى: نوفمبر 2013

تلفون: 02 33472864 - 33466434
فاكس: 02 33462576

خدمة العملاء: 16766
Website: www.nahdetmisr.com
E-mail: publishing@nahdetmisr.com



تأسست لخدمة محمد إبراهيم سنة 1938

21 شارع أحمد عرابي -
المهندسين - الجيزة

محش
شای
وطن!

إهداء

إلى عبدالله علي سلامة.

علي سلامة

آخر العنقود

لو تعرف أد إيه إنت جميل
جميل .. يا عبد الله .. جميل ..
ساعني ..

إمبارح كان دمي ثقيل ..
الشارع مابقاش زي الأول يا ابني
مطرح مانميل .. ممكن نرتاح
بقينا بنعدي من زحمه لزحمه
و كأننا بنطارد أشباح ..
إبني الصغير
يا لخته الحلوه اللي في قلبي
يا آخر العنقود ..

ساعني ..
إمبارح راجع مهدود ..
زي عمود النور الخربان
شبه الصوره اللي في الصفحه الأولى
في الجورنان ..
ومفیش بين كل العناوين
عنوان واحد للأفراح ..

مصحف شان وطن!

عارف..

كل ما عيني تقع

على شهادة النجاح..

أرجع ابصر عليك.. وعالشارع

أعرف إنها ورقه

زي بقيت الورق اللي اصفر

ومات في مكانه وراح..

هات حضن لبابا يا عبد الله

علشان أعرف أضحك من قلبي

وأقدر ابصّ في وشك..

صعب..

تبقي انت الحته الطاهره اللي ف قلبي

وأغشك..

ساعني..

مفیش حاجه شيلتها ف قلبك وضعت..
من أول قصقصة ورق
كتبت عليها قصيده وماعرفتش أكملها..
ولحد آخر دمه ف وسط الزحمه محدش خد
باله منها..
إلا انتي....

محبي شاي وطعم!

كشك الحراسه

أنا لما بافرح
بحكي للدنيا كلها
حتى لطوب الأرض
واحزن.. أخبي
واسكت كأني
عمري ما عرفت الكلام..
علمتي الغربه
أعد العمر بالثانيه
وامسك بروحي في الأيام..
ما بخفش م الضلمه
لكن بحب أنا م ف حضن وناسه..
ما عنديش بطاقه انتخايه
وعمري ما اتمنيت أكون وزير
ولا اتصورت إني أشوف تحت بيتي
كشك حراسه..
وجوايا طفل
بيعشق الحريه

وييكره العصايا
حتى لو كانت مصاصه..
وخدي بالك..
لو فكرتي تقتليني
يمكن تحتاجي أكثر من رصاصه..
لإني حتى وأنا بتزف
بيبقى فيه دايماً أمل إني أعيش..
وإن غبت..
ماتسألش..
أنا لا يرجعني حكم محكمه
ولا عسكري..
لكن يرجعني الحنين للغنا
وعشق الحياه في دمي
زي أحزاني..
ورائه..

بحب البرد

ويا سلام
لو حد هرب م الدوشه
وراح وجابلي ورد ..
واموت م الفرحة والدهشه
لو كتبت قصيده
وقولتلي حلوه ..
قولها ثاني..
أتنطط زي العيال الصغيرين
وأقولك احلف .. والله العظيم
بتتكلم بجد؟
يمكن عشان أيام الفرح قليله
سهل تتعد ..
عارف..
رغم إن المخازن كل يوم بتتحرق
ومفيش حساب ولا جرد..
ورغم وجود السيرك
والأراجوز..
والتلات ورقات ..

وجوز وفرد ..
عمري ما اتمنيت أكون أمير
أو ولي عهد ..
لكني بحلم بوطن
مفيهوش ولا حاره سد..
وطن بيفرح بحاجه
غير وصول الأهل لليابان
وحزنه أنبل
م الدموع البلاستيك
وعمليات التجميل
والشفط والشد ..
عارف...
رغم انها
بتقع ..
بتفرق..
بتنيل بستين نيله..
لكن جميله
وعمرها ما هاتتهد..
عشان كده
أنا لسه بحب حاجه
ولسه ف قلبي حد..

مصطفى صادق ووطن!

اللَّهُ يَرْحَمُكَ يَا سَبَّيْتُ

في كل بلكونه ف البيت..
كان السبب المتعلق ديباً ع الحيط..
أنزله يرجع بالقول..
وعمره يوم ما دلقي الزيت..
وانزله يرجع جورنان..
وانزله يرجع بالعيش..
وانزله يرجع قمصان..
ف وسطهم أفروا الجيش..
وانزله يرجع إنسان..
وانزله يرجع نسمة..
وطفل لسه مش طایل سور الكورنيش..
وانزله يرجع أفراح..
يوم النتيجة وزمايلي..
وشهادة نجاح..
وانزله يرجع جوابات..
وانزله يرجع حكايات..
دقه قلبي..

أول مره..
قلت أنا حبيت..
وانزله يرجع أيام..
وانزله يرجع أحلام..
دلوقتي بنزل أنا والسبت والبيت..
ونرجع إيد ورا وإيد قدام..
لا فرح معانا..
ولا حتى إبره وخيط..

٠ محبتي شادي وطير!

زراير القميص

بافرح أوي لما أقفشك طفله..
تلعب معايا استغمايه..
وعروسه وعريس..
وأخاف على ضحكك..
أخبيها بين الكتب والكراريس..
وبافرح أوي لما المحك أم..
بترفض ترد الباب ورايا..
تبص ف عيوني..
وتفرح معايا..
تحضني بقلبها..
وتدعي لي ف سرها..
وهي بتبت..
علي زراير القميص..

بحبك يا قلبي..

قلبي الوحيد..
الي من يوم ما اتولدت
ما خدش ولا يوم أجازة..
شغال..
سنين سفر.. ترحال
شال همومي عن رضا..
لا يوم كشر فوشي
ولا قاللي ليه عملت كده..
وف عز انشغالي
فكرني بهدوم العيد
واشترى لعب للعيال..
اتحمل غبائي..
وسوء اختياري..
وطيشي..
وأحزاني..
راح معايا الفرح
ومشينا سوا ورا ميت جنازه..

.. محبتي هادي وطن!

ودقنا طعم المر
والفرح وهو طازه..
عرفني سكة الأصحاب
وفتح أحضاني للأحباب
وعلمني إن الستر
مش لقمه
واربع حيطان وباب..
ولو ف يوم
كان فيه ما بنّا عتاب..
يميل عليّ وبرقه
يوشوشني
ويدلّني ع الحق..
ياه..
بحبك يا قلبي
أرجوك
إوعى تبطل دق..

كل الحكايه...

مسافر..

لا تأشيره دخول..

ولا تذاكر..

زي مطاريد الجبل

باهرب من عساكر لعساكر..

ميدان الجيزه

ضيعت شوية سنين كده ..
بحب من بعيد لبعيد ..
والحكايه مقضياني
ومبسوط وراضي وسعيد ..
أفرح بأي حاجه
وأستنى هدوم العيد ..
ويعدين ضيعت شوية سنين
نفسي أبقي أشطر واحد في الكيميا
مع إني مش فاهم ميدان الجيزه ..
والحياء رغم قسوتها
شايفها لذيله ..
وضيعت شوية سنين بقى
نفسي أعدي اختبارات الكوره
في النادي الأهلي ..
وأشتغل في وكالة ناسا
وأبقي واحد من العلماء المهمين ..
ويعدين ضيعت شوية سنين

منتهى أملي كرسي فاضي
في أتوبيس ثلاث خسرات
عين الصيره أم المصريين..
وضيعت شوية سنين
عايز أفهم
الفرق بين النكسه والهزيمة
والاحترام وقلة القيمه
وازاى أبقى نجم سيبا
وواحد م المشهورين ..
وبعين ضيعت شوية سنين
واقف عند نظريه المؤامره ..
لا عارف أعيش ف الزمالك
ولاراضي أعيش في غمره..
ومش عارف ليه الحشيش ممنوع
مدام مصر حين بالخمره..
ويا ترى بقى أتجوز واحده بيضا
ولاً سمره؟
ولاً أسأل فيها
رجال الفتوى والدين ..
وضيعت شوية سنين

محبتي لبلادي وطني!

مركز في السيراميك
والبيبان والشبايك
والوان الحيطان..
وده بيع وده سن فيل
والموضه الاصفر قشرة المزه
وضيعت شويه سنين
لا أنا بحر ولا نيل
حاجه كده بعيد عنك
ملهاش عوزه..
ولما بقيت كام وخمسين
لقتني لسه
بحب من بعيد لبعيد..
وبرضه مش فاهم
ميدان الجيزه..

تقاسيم ع العود..

لما كنت شاعر..
كان كل الغنا حزين..
ولما بقيت عصفور..
كثروا الصيادين..
ويوم ما قبلت قلبي..
معرفش أنا ابقى مين..
طب أعمل ايه..
لما كنت حلو..
ماكانش عندي كاميرا..
وقلت قشطه يا ابيض..
حببتي واحده سمرا..
وكل ما انوي اتوب..
بيرخصوا الخمره..
وانا اعمل ايه..
لما كنت أسد..
ماكانش فيه غابه..
ولما بقيت مفترى..

مصدقی شای وطن!

ما بقاش فيه ناس غلابه..

وعلى ما اكتشفت النبيله..

كانوا اخترعوا الدبابه..

وانا اعمل ايه؟

إيه..؟

إيه..؟

زحمه الورق

دي صورة جواز السفر ..
وهنا باصص ع القمر ..
وهنا ابتدى بيان الكبر ..
وابتدي بيقالي كرش ..
وده عقد الشقه القديمه
وده أول وصل نور
والقيمه المطلوبه
تلاته وتلاتين قرش ..
يااااااااااا

ودي ورقه بعشره جنيه
من ريحة السبعينات ..
في عز الحرب كانت
تقدر تعمل حاجات ..
وده صاحبي من زمن
لما افتكرت اسأل عليه
عرفت إنه مات ..
وده يوم الفرح ..

محبتي لبلادي وطني!

ودي البدله الكحلي القديمه
اللي لسه زحمة الدولاب
اتجوزنا ف أغسطس
والحكايه بدأت ف مارس..
إحساس وراح لحاله
لما ابتدوا العيال
يشيلوا شنط ثقيله
وهم رايعين المدارس..
ودي ورقه مهمه خالص
كل ما الاقيها..
تتوه مني ثاني
في زحمة الورق..

بضمان محل الإقامة..

دخلت دنيا وخرجت منها
لعدم كفاية الأدلة..
لما اكتشفنا أنا والمحكمة
إن مفيش ف مصر
حاجه مستقله..
ولا فيه معارضه
لكن فيه هدف مشكوك ف صحته
وكره طائشه ف العارضه
وعرض مغري على زيت القليّه..
أما عن بيانات البطاقه الشخصيه..
الاسم زي حاجات كتير
مش واضح..
وبخصوص العنوان..
القلب تعب لف ودوران
على حضن ينفع سكن..
أما الوطن..
شكل مطفي على ورق لميع..

مصحف شان وطن!

لون العيون: انظر الصورة
تشوفها عسلي تشوفها بني
متروك لإحساسك
وكانت شهادة الشهود
إني مواطن وزوج وأب مطيع..
نسيت روحي ف شنطة سفر
عشان عايز أرضي الجميع..
وبالكشف على تليفوني المحمول..
عدت عليه كل الفصول..
إلا الربيع..
ثلاث رسائل من ابني
بابات كلمني.. شكراً
ورسالة من بنتي..
مش انت يا بابا قلت
المهم نفهم ومش مهم المجاميع؟
أدينني لما فهمت يا بابا
مش لاقية مكان ف الجامعة
وفي احتمال مستقبلي يضيع..
وأربعين رساله من مراقي
كلهم شبه بعض

معندناش.. معندناش.. معندناش..
متساش.. متساش.. متساش..
الزيت.. الزيت.. الزيت..
وف النهايه..
تم الإفراج عني بضمان محل الإقامة
وخرجت..
لا لاقيت الإقامة..
ولا لاقيت البيت..

مصطفى شان وطن!

كيس البرتقان

ملقيتش في الشتا ونيس
غير كيس البرتقان ..
أخذ منه وأقشر
واضحك أحسن ما أكشّر ..
واكذب على روحي واقشّر
وأصدق إني بقدر
أفرح زي زمان ..
ولما خلص البرتقان
وراح م المكان الونس ..
قربت م التليفون
جايز يرن الجرس ..
لاقيتني أنا وروحي
مش مرتاحين لبعض
قلت مش مشكله
المره الجايه بقى
أعمل حسابي ف قفص
مليان بالبرتقان ..

فضلنا نبص لبعض..

نبص لبعض..

ونبص ف الساعات..

مستنين مين يقول للتاني كل سنه وانت طيب

لحد ما الوقت فات..

عرفتي يا حبيبتي

أد إيه صعب السكات..

لب وسوداني

بقولها ما تيجي نهر
نجري ونلعب..
ونكسر كل الحاجات..
ونجيب م اللي فات..
يومين حلوين...
قالتلي والنبي إنت فايق ورايق..
قولتلها طب وليه نتضايق؟
إحنا لسه صغيرين..
واكبر عيالنا..
يا دوب تسع سنين..
يعني لو بنحكم مصر..
تبقى يا دوب لفه ونص..
مش عشرين..
- وطى صوتك البيت بتذاكر..
والواد ما صدقت انه نام...
إنما إيه اللي صغى ف قلبك من تاني الغرام..
قولتلها جوايا كلمتين غزل..
قالتلي والنبي إنت غسل..

بس هي الظروف..
 - ماها الظروف؟
 فاكراه لما كنتي بتحوشي م المصروف؟
 جبتي ورد ف عيد ميلادي..
 - وجبتلك بلوفر صوف..
 - وجبتي بلوفر صوف..
 - فاكراه لما بوسنتي واحنا لسه مخطوبين وابويا لاحظ؟
 يلهوي كنت هموت م الكسوف..
 - فاكراه اول مره قلت لك بحبك؟
 وشك احمر
 - انت الي وشك كان مخطوف..
 - مش انتي كنتي بترسمي زمان؟
 - وانت كمان كنت بتكتب شعر..
 - هو احنا بطلنا نحس؟
 - احنا بطلنا نشوف..
 وطلعنا اللب والسوداني..
 وفتحنا التلفزيون..
 وسكتنا ثاني..
 ولازال السبب..
 غير معروف..
 غير معروف

.. محبتي شاتي وطن!

كلام سخيـف

زهقت من قولة
دي بنت بألف راجل
أنا عايزه أحس افي معاك
مخلوق ضعيف..
وإني فعلاً بنتمي لجنسي اللطيف..
إحيني من حزني
ومن إحساس مخيف..
طول النهار مكشـره
وواخداها جد..
ولله شعري على ورا
ومش شايفه حد..
والدنيا حر موت وأنا
مليانه برد..
وكل ده عشان يادوب
أعدي الرصيف..
ماعدش ف الشارع شجر
بيرمي ضل ..

وكل يوم حاجات تضيع
وحاجات تقل..
وانا خلاص
ماعرفش ليه بقيت أمل
واعذرني لو كان الكلام
مُرّ وسخيف..

كارت جديد

جبت كارت جديد وشحننت..
وسمعت الرصيد..
وانبسطت..
وقولت أطلبها..
طلبتها..
ولسه هاقولها..
أنا بحبك..
قالتلي الأسانسير عطلان..
والواد خد الدور..
سخن ملهلب نار بردان..
إن لقيت برتقان في سكتك هات..
ولو عديت على أجزخانات..
إبقى رنئي..
قفلت.. وقعدت ع الرصيف..
أبصع الدنيا والدنيا تبصلي..
ووقفت قدام الأجزخانه..
أبحلق ف الإزاز..

صَحَّاني صوت الصيلبي..
عايز حاجه يا أستاذ؟
قلت له:
تشتري التليفون ده ببلاش؟
ومن ساعتها مكلمتهاش..

محش مشاي وطن!

عائزه انام

خد وادي معايا
وقولي كلام غير أي كلام..
ولّا الدنيا خلاص
والناس بطلوا حب وأحلام؟
طب أقولك..
إحكي لي حدوته لحد ما انام..
والعبي في شعري
بقاله سنين مشدودع البكر..
في بطاقتي الشخصيه..
مبوت إن أنا أنثى وإنك ذكر..
والميه الرايقه ساكته سنين وملاها العكر..
كام صيف وشتا وخريف ومطر
فتش جوايا..
تلقى حاجات وحاجات وحاجات..
ضحك الفوانيس..
وعروسه وعريس..
ودلع ومياصه ولؤم بنات..

وجرّب تعزف..
يمكن لسه جَوّانا نغم وعجب..
وسا محني ان كنت صريجه معاك
شايفاك في عيونك نار وغضب..
سمعاك بتقول:
ودي مين رباها بنت الكلب
قليلة الأدب؟

محبتي مثالي وطن!

رياضه..

بقولها انا حاسس بفراغ
قالتلي العب رياضه ..
قلتلهافيفيش حاجه لها طعم
قالتلي يقطعني..
أكون عملت القهوه ساده ؟
قولتلها احنا محتاجين تقرب من بعض..
قالتلي طب شيل إنت الكرسي
وانا هعُدّل السجاده..

كنت كل ما اشتري لعبه.. أخبئها

واستناكي تخفي...

عشان نلعب سوا بيها

واستنى..

واشتري غيرها

وأشتري اللي بعديها

واتمنى تقومي ويروح عنك التعب..

لحد ما ضاقت هدوم العيد

وصفرت علينا اللعب..

وانتي لا بتخفي..

ولا انا باقدر اللعب مع حد غيرك..

مصحف شادي وطوي!

مصر اللي ما خدنهاش في المدرسه..

إحنا بلد

حببيك يبلعلك الزلط..

والوزير يقول بيانات غلط..

والرئيس يوقع.. والميه تكذب الغطاس

واحنا بلد..

كل ما تتزحم الشوارع

تختفي الناس..

واحنا بلد العلم ف الراس ..

والامتحان من كتاب الوزاره

والإجابہ من الكتاب الخارجي

والنتيجه.. ارمي حولك على الله

واحنا بلد..

من سبع تلاف سنه يقول آه..

وفكرينه بيهزر

واحنا بلد..

لا بقى قادر يضحك

ولا عارف يكشر..

واحنا بلد..
يحفظ أغاني العشق ع الكورنيش..
وينساها ف طابور العيش..
يتجوزع الرصيف
ويطلق لما يلاقي شقه..
واحنا بلد..
الفهلوه والجدعنه
وإدي زوبه زقه..
واحنا بلد..
إتعود يقول نعم
لحد ما نسي كلمة لأه..
واحنا بلد بيلعب كثير ف الساعه
لحد ما باظت والوقت ضاع..
واحنا بلد ييكى يوم الفرح
ويغني ف لحظه الوداع..
واحنا بلد..
كل اللي اتعلمه من كتب العربي
إن السين لها ثلاث سنان..
واحنا بلد..
بيشمر البنطلون

مصطفى مشاي وطن!

عشان يعدّي الشارع الغرقان..

وبرضه بيتبل..

واحنا بلد بيحب يتوه

وملوش مزاج يلاقي حل..

ولو حصل وزهق ومل..

يخرج م البيت يقعد ع القهوة..

واحنا بلد..

كل ما يقع

يقول معلش أصلي لامؤاخذه

أناخذت على سهوه..

واحنا بلد..

كل الي اتعلمه من كتب الحساب

إنه يشقلب السبعه تبقى ثمانية..

وكل الي اتعلمه من كتب الكيميا

إنه يحب واحده..

ويتجوز واحده تانيه..

واحنا بلد

بينسى العمر كله

ويفتكر قبل ما يموت بكام ثانيه..

ما تاخذش فى بالك

الدنيا مش ديا طيه ..
وتعمل إيه
يا اللي انت دموعك قريبه؟
وما بتخيش ..
تمد إيدك ف جيب القميص ..
تطلع الورقه اللي فيها
اسم الدوا
كام أجز خانه ..
والإجابہ
نفس الإجابہ ..
مفیش ..
الدوا ده ناقص ..
يمكن بيعجى كيان شهر
وجايز ما يمیش خالص ..
اسأل قدام ..
إنت عارف الدوا ده بكام؟
سألت ودورت ولفيت

محبتي شاتي وطن!

تعبت ..
ولاقيتني قريب من هنا
قلت اعدّي
بس ياريتني ما عدّيت..
شوفتك
حد شبه صاحبي
لكن مش هو..
التاني كان أصغر منك بكثير
وأجل منك بكثير
شربت قهوه وميه وعصير
بطعم الخيره اللي ف شارع القصر العيني
وتعب عسكري واقف خدّمه
ف عز حر أغسطس ف قلب ميدان التحرير..
ونزلت ادوّر من تاني..
عن صاحبي اللي بعجد..
واسأل ع الدوا
وأسمع نفس الرد..
مفيش ..
ناقص..
يمكن يجي كمان شهر
وجايز مايجيش خالص..

أبوي العزيز

كنت صغير
ومش واخذ بالي..
إن القلب الي بيضحك ده
مليان ع الآخر ومعبي..
كان نفسي أقولهُ
علمني يا ابويا أزاى الراجل
يقدر على دمعه..
وازاى بيخبي..
لويكي..
ياخذ جنب..
ولو يضحك..
ضحكته بتجيب آخر الشارع..
كان نفسي أقولهُ
لكنه راح..
وقالي اعرفها لوحدك
أتاريه كان رايح مش راجع..
ماعرفش ليه هف علي النهارده

.. مصفى شادى وطن!

يمكن عشان..
مبقاش الحزن زي زمان.. طيب
بقى بيعري جراحنا
وما حدش شايف..
وما حدش سامع..
ولا حد قريب..

قبل القطر ما يقول توت

قبل القطر ما يتحرك بدقيقه..
سلمتي بسرعه وجريتي
يا ترى كستي بتهربي من لحظه وداع
ولأخايفه أسألك..
تبان ف عينيكي الحقيقه؟
سلمتي..
وروحتي..
لا قلتي خد بالك على روحك
الدنيا ف الليل بتبرد..
والناس ف الغربه
من دمعه بتمرض وتموت..
إشمعني المره دي
غاب حضنك عني
وساب البرد يستفرد بيا
من قبل حتى القطر ما يقول توت؟

محبى ملى وطن!

عايز اكرهك..

عايز اكرهك..

بس مش قادر..

و نفسي احضنك..

وبرضه مش قادر..

عايز اشطبك من كل الدفاتر..

جريت أبعد..

وانسى بالسفر..

قضيت العمر كله مسافر .

وبرضه مش قادر..

تقبله الأيام ع القلب
كانها جبل حجاره..
تشيل حجر..
تلاقي حجر..
انا عارف إنك حزينه
وان اقرب ضحكه فينا
قدامها سنين سفر..
وانا عارف انك جريحه
لكن من قسوة الحقيقه
مش عايز اسمع الخبر..

محبتي شان وطن!

بطاقتك تموين..

رساله رايحه..
ورساله جايه..
والقلب طاير..
والدنيا حلوه..
والهوا طير كل الستاير..
قالتلي صورتك جميله..
قولتلها كان عيد ميلادي..
والدنيا برد.. أو اخر يناير..
والأموره دي حضرتك..
قالتلي دي أول مره..
أسيب شعري حر كده..
من غير ضفاير..
إنت باين عليك ابن حلال..
قولتلها أوي والله..
وخجول جدًّا..
لا قهوه ولا شاي ولا سجاير..
خريج علوم قسم كيميا..

ويشتغل ف التنسيق الحضاري..
وعندي وصله دش ونت..
شرکه مع کل العماير..
قالتلي أنا زراعه قسم حشرات..
وموظفه ف الشهر العقاري..
طول النهار أختم توكيلات..
معظمها للبيع وللمحامي..
مصر كلها ف المحاكم..
ومفیش ضماير..
قلتلها عامله إيه..
مع الزحمه والناس؟
قالتلي باخد توك توك..
واکمل بمیکروباص..
وکل ما ارسم قمر..
يطلع يا دوب شويه دواير..
إحنا خمسة اخوات..
ولد على أربع بنات..
أمي عايشه..
وأبویا مات..
والموت علینا حق..

محدث شاعر وطن!

وده كاس ودایر..
قلتلهأ یعنی یتیمه زیی..
أنا أبویا وأمی ماتوا..
وسابوا الستر..
وبطاقه تموین..
ونص فدان مانجه..
من ثلاثین سنه..
لسه بشایر..
قالتلی مش عارفه لیه..
ارتحتلك وفتحتك قلبی..
قولتلها وأنا کمان..
ولسه ها قولها انا حییتک..
النت فصل یا معلم..
ولاقتنی ف الهوا..
أنا..
وروحی..
وبطاقة التموین..
وشویه زرایر..

طراطيش كلام

سمعت بس طراطيش كلام
والسلام عليكم
عليكم السلام ..
بقيت بخاف أنا
أصحي على نفس الكابوس ..
أنا شفت الخطر
لكن لما سألت عن الراجل
اللي بيدق الناقوس ..
ناس تقول ده مات
وناس تقول محبوس ..
ولما جاني ف المتام سيادة القانون
قلت له فهمني واحده واحده
كده بالمحسوس ..
وقولي يا مولانا
إمتى ف بلدنا
ها تتساوى الرووس ؟
لكن لما نزلت سوق الخضار
عرفت حقيقة العلاقة

محبتي مشاي وطن!

بين الرئيس والمرءوس..
وفهمت ليه إحنا لسه واقفين
عند مرحله
يا ترى أحسن خافض للحراره
الحقن ..
ولاً اللبوس؟
ولما اتفرجت على مذبحه أنابيب الغاز
اتأكدت إن أهم إنجاز لوزارة البترول
وجود ثلاث فرق ف الدوري
وحلم الفوز بكاس الكئوس..
وسألت عن معنى كلمه بتوجعني من زمان..
وماخلتش ولا قاموس..
سألت الدكتور مجدي ..
وفتحي الترزي..
وحربي بيع العرقسوس..
لكن لما شفت ناس
بتفرط في أمه بحالها
قلت الله يرحمك يامه
بقى عشان درجتين ف الكيميا
تقوليلي جتك ستين خيه
يا موكوس..!!

حصّة جغرافيا..

هنا النيل..
وهناك إسرائيل..
والقاهرة العاصمة
لكن الحزن
أهم المحاصيل..
وده الخطر
ودي ناس بتستنى المطر
وده الليل الطويل..
ويين صحرا ودلتا
وشبه جزيره..
كل يوم بتضيع حاجات كتيره..
معدل النمو عالي
حسب كلام معالي الوزير..
لكن للأسف..
البلد فقيره..
وما تسألش ازاى..
أهم المشروبات الشاي
وأهم الصناعات

محبتي شاتي وطن!

البيره..
عدد السكان..
ملايين كثير متفرقه
حزم.. حزم..
أهم المعالم
في وش البلد
يوجد كل محلات الجزم..
وأهم الأحداث
مولد أبو حصيره..
من مصادر الطاقة
الغاز الي مش طبيعي
وأهم الموارد..
قانون الضرائب
لكن أهم المعادن
الناس الطيبين..
وأهم المواني
أغاني العاشقين..
وأحلي المواسم
يوم ما الفرح يعدّي ع القلب الحزين
وأعز الحبايب
بلادي الأسيره..

كيس بلاستيك

من كتر ما الحزن رطوط..
مبقاش خلاص يتحسّ..
فضلت الأحلام
تتقصّ.. تتقصّ.. تتقصّ..
لحد ما بقت ف النهايه..
رغيف..
وكيس بلاستيك..
ويس..
عارف..
باصحّي قلبي عشان يحب..
قام بقرف..
واتلفتلي وبص..
ورجع نام تاني..

.. مصفى شاي وطن!

محضر إثبات حالة

بتموت ف الزحه حاجات

وحاجات كتير بتتغير..

واعمل إيه

وانا شوية النفس اللي عندي

يا دوب على أد الواد الصغير؟

آخر القناديل ..

والونس..

والعكاز..

يا طعم أحلى شوية شاي

في الكوبايه الإزاز..

محطات كتير فانت..

عارف يا ابني

الشكوى أول ما تبقى محضر

ورقم ف دفاتر

تبقى ماتت..

معذور الظابط

لو مقدرش يشوفك

أو يسمع شكواك..

لا هو فاضي يتألم عشانك
ولا يقدر يضحك معاك..
معذور الظابط
والبدله الميري ساعات بتكتف..
والدنيا مش على طول بتحدف..
بني آدمين..
محدث فينا يا ابني
بيختار الوقت
إمتي ها يعشق
وها يعشق مين..
يارب
لو كان مكتوب علينا الفراق
يفضل ف قلوبنا حنين..
فانت سنين
وكل ما اقول هانت خلاص
ألاقي لسه المشوار طويل..
وكل ما اقول عطشان يا نيل..
أعطش زياده..
تعالى ف حضن بابا
علمني من تاني معنى الحياه
وقولي سر السعاده..

المبرر الوحيد إني أصحى
هو بس عشان اشوفك..
وبعدها..
بارجع أناام..
خلص الكلام..

محشوشان وطن!

حاجات بسیطه

كلها حاجات بسیطه

وَأدِیْه بتفرق معايا

أدِیْه..؟

زي إيه..؟

زي إحساس بالرضا..

وزي ما احبك كده..

وزي دمه طيبه..

ارتاح بعدها

وما عرفش ليه..

وزي إيه..

زي ورده ف عيد ميلادي..

وزي يوم بسیط وعادي..

عدی لکن مانستهوش..

وكلمه حلوه سمعتها

من قلب حد انا ما عرفهوش..

زي ما فاضفض معاك بكلمتين..

وف وسطهم أسرح

تقوللي روح فين؟
وزي إحساس بالأمان
لما ليله أبات ف حضن اصغر ولادي..
وزي غنوه من بعيد
فيها من ريحه بلادي..
كلها حاجات بسيطة
وأديه بتفرق معايا..
أديه؟

لنرى محشي شاي وطبخ!

عين الباب السحريه

ناس بعيد عنك لكن..

ترتاح أوي لكلامهم..

وناس لما تدق بابك

ترد: يوووووووووه..

ودول إيه بقى اللي جابهم؟

وناس..

مطرح ما تمشي معاهم

تلاقي الدنيا أمان..

من كتر الدفا اللي فيهم

بساعة ما ياخدوك بالحضن

ما تعرفش إن كانوا هم أعز اصحابك

ولاً انت اللي أغلى احبابهم...

مبسوط

يسألوني ليه..
ومن إيه كده مبسوط؟
ما هيّ هيّ الشوارع..
والناس..
ونفس البيوت!
والعيد بيعجي..
وزي ما بيعجي..
بيمشي تاني ف سكوت..
معذورين أصحابي..
ولا مره شافوني عايش..
لكن كتير شافوني..
وانا بموت..

شقاوة خريف

أنا كنت ضعيف في النصوص
لكن في التاريخ فلتة..
أتجاوزت مرتين ..
ونفسي في الثالثة..
مش فراغه عين ..
ولا دناؤه..
لكني حاسس إني مخلوق بألف قلب
وكلهم عاملين شقاؤه..
أما الدنيا دي حلوه حلاوه..
يخرب بيت كده..
تمد إيدك تساعد حد
يرد عليك بنظرة رضا..
ما تعرفش ساعتها
مين اللي كان محتاج للتاني..
مش قلت لك
اللي بنى البلد دي
كان ف الأصل حلواني!..

قولي لي يا حلوه
مين ذلك على قلبي؟
وليه اللي رماني
وخلاني ابوح
واهرب من كل الزيف؟
يا ترى دي شقاوة خريف
ولاً بداية شتا ..
ونهاية صيف؟
ولاً أنا اللي كل ما اقرب من روحي
بتبعد عني أحزاني؟

❦ مصفى شاي وطعم!

مزيكا قاعمه

لو تعرفي..
أد إيه كلامك رقيق..
كأنه ونس..
وأصحاب..
وزاد للطريق..
كأنه نسمة م الزمن الي راح
زي البراح...
ساعه ما الدنيا تضيق..
عارفه....
ساعات أقول دي مش حقيقه
ده حلم حلو..
وكلها كام دقيقه
وبعدين خلاص..
واستكثر على روعي الفرح
اشمعني يعني الدنيا
تختارني أنا
من بدون الناس؟

كني لما باحضنك
بقول لروحي.. لا
ده إحساس بجد
وبحق وحقيق..
إحساس جميل لدرجة تخض..
وأنا اللي طول عمري يطاوعني الكلام
ما عرفش ليه لما اسمعك
غصب عني أسكت
وما أعرفش أزد!
قولي كمان..
ماتسكتيش..
مين في الزمان ده يلاقي قلب يقوله عيش
ويروح يموت؟
عايز أسألك..
عملتي ازاي غنوة فرح
من مفيش؟
وازاي هربتني من حزن البيوت؟
قولي كمان..

إزاي...؟

يخرب عقلك..

إنتي منين...؟

حتي عيونك ليها شخصيه..

إنتي ضعيفه ازاي وقويه..؟

وازاي بتخليني محتاج الاتنين..

ازاي...؟

يخرب عقلك..

ده انتي حكايه..

إيه الإحساس ده اللي بيخطفني

ويكبر جوايا..؟

إزاي بتخليني موافق

ضدي كنتي ولا معايا؟

طالع راضي ف الحالتين..

ازاي...؟

زمان..

كان لما يدق الباب خبر حزين..

كانوا يخبوا العيال الصُغَيرين عند الجيران..

عشان قلوبهم ماتنجرحش..

أد كده كانوا بني آدمين!

زَلَبَطُهُ

كان شعري ناعم جميل ..
وعيونى شايقه النيل ..
فضل ونعمه من ربنا ..
طاهر بريء حر ..
أنا اتخلقت ..
يا ترى بعد كده اتخلقلى زَلَبَطُهُ ..
ولأنا بمزاجي خلقت ؟
ماشي فرحان
وخذت راحتي مع الفرح والأمل ..
وزي ما تقول كده اتحببت ..
وهي لحظه يا معلم ..
ماعرفش نمت أو غفلت ..
أو جايز سرحت ..
لاقيتني طاير ف الهوا ..
وع الأرض طاخ ..
جايز أكون اتزحلقت ..
الهبد ه كانت تقريباً جامده ..

لأن نفسي راح..
ودمي ساح..
كأني اندبحت..
فضلت أندب ف حظي..
وأقول لروحي..
يا عم خلاص..
إنت يعني إمتى عملت حاجه وفلحت!
دي الدنيا راحت..
وجت وراحت..
وانت يادوب بصيت..
واستغربت أوي وثنَّخت..
المهم انا ساعتى راحت فين؟
وفين دبلة الجواز؟
وأقول لمراقي إيه..
اتسرفت؟
أقول لها الشارع كان ضلمه..
وفيه ماسوره ضربه..
ما إحنا مقضينها..
فحت وردم وفحت..
ولما خدت نفسي وريَّحت..

❦ مصيبي ماضي ووطن!

قلت أنفّض هدومي..
وارجع محترم تاني..
لا لقيت القميص..
ولا البنطلون..
ولا لا مؤاخذه الحاجات اللي تحت..

مفیش کوکو

آخر كلام يا عم..
طعام..
يعني مَم..
يعني على سبيل المثال..
سندوتشات..
وأرجو کو..
ماحدث يجيب سيره الكو کو..
قدام العيال..
و کو کو لى مش عارف..
يعني دجاج..
يعني شوربه..
يعني زَفَر..
معقول ده محتاج..
عقد عمل..
وغربه..
وسفرا
عارف..

❦ مصفى مشاي وطوى!

لسه شوارعنا بتخاف من المطر..
ومطر للي مش عارف..
يعني خير..
إزاي ف بلدنا الخير..
أصبح خطر؟!

الواد ابني

الواد ابني
أبو لسان طويل ..
قاللي يعني يا بابا
سافرت واتغربت
مشوار طويل ..
وف الآخر راجع ..
في شارع ..
متفرع من شارع ..
وشقه
في الدور الرابع ..
ودولار
نازل طالع ..
شوية هدم وحاجات ..
دكان مستني التراخيص
ومكنسه على خلاط ..
وكمبيوتر مش نافع ..!
م الآخر ..

❶ محبتي لبلادي وطن!

ما عرفتش تتصرف

مقدرتش تقول لأ

مش مسافر..

بابا...

من إيه الكحه دي يا بابا؟

يا ترى دي برد..

ولاً عمر..

ولاً سجاير؟

عارف يا بابا

أنا بقالي أد إيه بستناك؟

إيه يا بابا

إنت بتعيّط؟

ده انا كنت بهزر معاك..

كنت بهزر معاك...

مصارييف المدرسه

البنـت بـتـي..
كل يوم تكبر سنين..
حلـوين عـينـيـها..
بس لـيـه..
مش فرحـانـين؟
فـي السـن دـه..
وـيـتـقـول كـلام..
سـاعـة ما تـصـحـى..
بـاـكـون هـنـام..
حـاـولـت أقـرب مـنـها..
لـاـقـتـنـي مـش عـارـف..
أنا ابقـى مـين..
وـفـتـحـت قـلـبـي يـقـوـلـها..
مـلـقـيـتـش غـير..
مـصـارـيـف المـدـرـسـه..
وـفـلـوس المـدـرـسـين..

مصطفى هادي وطن!

موسم امتحانات..

هي دي بنتي الوحيده
اللي حبيتني في البنات..
هي دي..
اللي هناك بتضحك..
هي دي..
اللي هناك بتلعب
ولما روحي مني تتعب...
تملا قلبي بالحاجات..
هي دي
اللي هناك بتحلم..
وفي عيونها غنوه حلوه
بس من خارج المقرر
هي دي..
قبل ما الجهل اللي في المنهج يقرر
يقتل الروح البريئه
بالكتب والكراسات..
علموها في المدرسه ترطن لغات..

تحفظ النص الغبي
وتشرح معاني المفردات..
ترتعش إيديها فوق ورق الإجابة
لما تعرف إن ممكن حلمها يضيع منها..
على ريع درجه
هي دي ..
اللي بتغيب وتبدل..
كل ما يهل علينا
موسم امتحانات ..
هي دي ..
اللي بتقرا في كتاب التاريخ
عن معجزات ..
وتبص ع الدنيا
تلخبطها الحقيقه ..
لما تلاقينا مطرودين م التاريخ
خارجين من كل البوابات..

فاكر كلامك بالحرف..
البوح ده نص العلاج..
واوقات كتير بنحتاج ..
نحس بالضعف..

.. مصفى شاي وطن!

بطاطا بطاطا

الوقت متأخر
وما عدش ينفع..
طول عمرك بتيجي على نفسك
وتسافر.. وترجع..
إشمعنى دلوقتي
عايز تروح ما تجيش؟
وكل ما أقولك مالك..
تقول.. مفيش
هو انت لسه بتفكر؟
ودلوقتي..
بعد ما بقيت بتنهج من سلمتين..
رايح تدور على وطن تاني فين؟
فاكر الزمن واقف ما بيتحركش
بص ف تاريخ ميلادك
واحسب سنك..
استنيت ليه لما كبرت
والحزن بقى أكبر منك!

كان ف إيدك الورق
ومستوفي كل الشروط ..
فضلت تحسبها بقلبك
وقطعت الورق
وحلفت والله ما هموت
غير ف حضن الحبايب ..
طول عمرك في الحساب خايب ..
الوقت متأخر ..
وما عدش ينفع ندم ..
جواز سفر محترم
كان كفيل ..
يحمي طفلك الجميل ..
من كل تجار الفساد ..
يا أخي كنت اعملها
عشان خاطر الولاد ..
جواز سفر محترم يا عم
كان أهم من كل اللي كتبه
واللي لسه ها تكتبه ..
قلتلك دول وحوش ما بيرحموش
ولا هايطلوا يكذبوا

الوقت متأخر ..
والله يكون ف عون الي يقع ف البلد دي
ويقول أنا محتاج ..
معلش يا ابني ..
لا عندي صبر ولا ف إيدي العلاج ..
سامح أبوك لو كان تعب أو مل ..
سامحني يا اجمل الجراح
يا بدر زاح عتمة الروح يوم ما طل ..
عارف
بكره لما نقف قدام المولى عز وجل ..
لما عقدة لسانك تتحل ..
اتكلم وخذ حقت
من كل الي ظلموك ..
وأولهم أبوك ..
واسألنا كلنا ..
اسألنا قدام ربنا
عن العدل .. والرحمة .. والإنسانيه
بس انا عارف
إن قلبك الطاهر الي علمني
معنى الحنيه ..

بيعرف يسامح
لما تجري تبوسني ف راسي
وتقوللي ..
بطاطا بطاطا..
بحبك يا بابا
وأنا كمان يا حبيبي..
بطاطا بطاطا..
أد الدنيا دي كلها

مصدق مشاي وطن!

جريس الباب..

الله يكون ف عون
اللي ملهوش أصحاب..
يفرح لما يسمع جرس الباب..
يجري..

يفتح يلاقي المكوجي..
يفتح يلاقي وصل النور
يفتح يلاقي شوية برد..
ويفتح وما يلاقيش حد..
يرجع يدور ف الدفاتر القديمة
وألبوم الصور
ويقرأ للمرء الألف
نفس الجواب..
الله يكون ف عون
اللي مفيش معاه
غير شوية عناوين..
وأرقام تليفونات
مايعرفش أصحابها مين..

وغنوه قديمه
وورده دبلت ف قلب الكتاب..
ياه..

معقول ييجي يوم يا قلبي
ونتسول شوية ونس؟!
معقول ليالي البوح يصيبها الخرس؟!
يا ترى شكلهم إيه يا قلبي
اليومين الجايين؟
ويا ترى هاتميل على مين
لما تحب ترتاح؟
إياك تبطل تحب
واوعى ف يوم تنتظر اللي راح
ومش راجع..

قلب الياسمين

قراطين أرض..
ونخلتين قرييين من بعض..
وبيت من طين.. بعيد
بعيد في الخلا..
يبعد عن القرف
مسافة ميت سنه بالطياره..
ومفیش الصبح..
قهوه..
ولا سيجاره..
ولا تليفون..
ولا ساعه..
ولا نشرة أخبار..
ولا جرائين..
ومفیش سقف
بيني وبين السما..
أتلف ف روحي وأنا
ده إن نمت..

وحوض ياسمين
يفكرني إن في يوم م الأيام
عشقت..
وسمعت أحلى غنا..
بيت بسيط..
مش مخنوق زي علب الكبريت..
وكلب وافي..
بديل عن كل اللي راحوا م الأصحاب
يحميني لو قرب م الباب عفاريت..
ووصيه أكتبها واسيبيها في عش العصافير
أمانه يا طير..
إن مت دلوقتي..
أو بعد حين..
تدفني في قلب الياسمين..

كرسي بلاستيك ع النيل..

الصيف والدنيا نار
والحر ضيف ثقيل..
ومصيف الغلابه
كرسي بلاستيك
ع الرصيف اللي بيطل على النيل..
إزازه ميه..
وسندوتشات بيتي..
وشاي..
وأمل ف نسمة
وضحك م القلب تكفي
مانعرفش ازاي..
يمكن ينام الحزن
ولو مؤقتا..
شكرا يا وطن..
سايب ع الرصيف مساحه
لسه متباعثش..
خلي عينيك ع العيال

العربيات بتجري بسرعه

والطريق مفتوح..

ساعات بحس إنك زي النيل

مجروح.. لكن ساكت.. مايتكلمش

اسرح زي ما انت عايز

بس عشان خاطر العيال

ماتبعدش..

متنساش تأكدع الواد

رغبه أولى طب..

يا ستي

خليه يروح مطرح ما يجب..

لسه زي ما انت

تنجرح وعلى أد ما تتألم

مايتعلمش..

جنتني..

إنتي كمان اتغيرتي عن زمان..

فاكره لما كنتي تلاقي

ف جيب القميص فلوس

تجري علي

وقبل ما تقوليلي ضايح منك إيه

محبتي لسان وطون!

كل شيء في عينيكي بيان؟
بقالك كتير مابتفتشيش جوابا..

ياه..!

دي العيال نامت
لمي بقى الحاجات معايا

هذا الرقم موجود بالخدمة...

لما مساحة القلب تقل ..
وتبقى الشجرة جنب الشجرة
ومفیش ولا شجرة بتطرح ضل..
لما الأرقام اللي بتضيفها على تليفونك
تبقى أقل كثير م اللي بتمسحها..
حافظ ع الأيام اللي ف قلبك
وإياك تجرحها..
اطلبها..
ولو ماتردش اطلبها..
ولو ماتردش..
سيب الخط ما بينكم مفتوح..
الأيام الحلوه..
عمرها ما بتخرج بره الخدمة
ونس جوانا فين ما نروح..
اطلبها..
ولو ماتردش اطلبها..
اطلبها..

محبی شای وطن!

لما تحس بقسوه لیل الشتاء والبرد..
اطلبها..

واوعی تصدق
إن مفیش حدّ بیرُدّ علیک..



خائف اقلق بالليل كده زي ما بقلق..
أو على وش الصبح
أو بعد العصر..
وافتح الشباك
وابص..
ومالاقيش مصر..

❁ محبش نشان وطن!

سیاره مضخه..

اليوم خلاص قَرَب يفوت..

وماعدش غيري ع المحطه

والسكوت..

وفرد أمن..

بالصدفه كان ف اليوم ده خدمه..

محتاج لقلبك يا ترى

ولأنا ..

محتاج لهدمه؟

اليوم خلاص..

ده خوف ده ولأحسن ناس

بيطّل من قلب البيوت؟

لولسّه بنحب الحياه

إزاي نموت؟

اليوم خلاص..

لكن عيوني ع الأمل

يمكن هنا..

جايز.. هناك

تايه أنا
يا ربي مين
اللي مغمى عيون الشباك؟
بعيده المسافه
بين حد أدنى للأجور
ورغيف وعتمه ووصل نور
واربع حيطان
لاجل ما نكتب ف استهارة المدرسه
عنوان سكن..
بعيده المسافه بين قلوبنا والوطن..
بعيده المسافه بين مفيش
ولما تسأل ما تلاقيش
غير القلوب الضيقه
نفس المسافه.. بين عشوائيه
وحياه طريقه ناعمه آخر فخفخه..
خايف تكون كل الشوارع
سيارات مفخخه..
قاصده الوطن
كاتدرايه ومشيوخه..
يا ربي مين..

فتح مصفى شافى وطن!

وسط انشغالنا بمين هايحكم

ومين هايحل

ومين شبال ومين يمين

يا ربي مين..

وسط انشغالنا بالزباله

بيحرق الورد الجميل

ويسرق النيل الأمين..

يا ربي مين؟

تشابه أسماء

ده طفل لسه مولود
ما يعرفش حاجه
ويصرخ ويقول واء..
ودي لقمة العيش
اللي بقت بتيجي بالحناق..
وده الشارع
وده الميزان
وده استقلال القضاء..
ودي المسافه
بين مصر الجديده وجزيرة الوراق..
وده جوازع الورق
بدون قبول واتفاق..
ودي الجماعه وده الحزب..
ودي ثروة بلدنا
وده الكذب..
وده الرياء..
وده الدستور

وده شكل بكرة

بدون زواق..

وده عشم الطيين

وده خيال الشعراء..

ودي قرية منسية

تفصلها عن الحياة

وصلة ميه

وماسورة صرف صحي

ولبه شمعتين..

أما دول..

دمعتين..

في ساعة صدق

أو لحظة فراق..

ياترى دي مصر بجد

ولأده تشابه أسماء؟

إنتهت النشره..

في خبر عاجل م العباسيه..
تمكنت عصفوره مسلمه
من اختراق المجال الجوي المسيحي
والهبوط على سطح الكاتدرائيه..
هذا وقد تم احتواء الموقف
بعد اعتذار السفير..
في حين تمكنت فراشه مسيحيه
من التسلل لحديقة الأزهر
دون الحصول على إذن من مكتب الأمير..
وقد قرر حاكم دوران شبرا
فصل قصب السكر المسيحي عن البرتقان المسلم
في جميع محلات العصير..
هذا وقد أدى اعتصام الذهب المسيحي
إلى ارتباك شديد في الأسواق..
في حين أحبطت مباحث عين شمس
محاولة تسلل الفضه المسلمه عبر الأنفاق..
وإليك هذا التقرير..

مصحف شان وطن!

وف رد فعل عنيف..
تقرر وقف إمدادات الغاز المسلم
لأي بوتاجاز مسيحي
لحين مراجعة عقود التصدير..
في حين اعتبر تجار العسل المسيحي
مظاهره النحل المسلم ضد حكومته شأن داخلي
ولا يحتاج إلى تفسير..
وقد تمكنت قوات حرس حدود مصر القديمة
من إحباط محاولة هجره غير شرعيه
لسمك بلطي مسيحي من الحجم الكبير..
وفي شأن آخر..
وجهت نيابة ميدان الجيزه..
تهمة الخيانه..
لكروان غير معلوم الديانه..
دخل الميدان بدون فيزا..
وكان يغني..
الملك لك وحدك يا صاحب الملك..
انتهت النشره..
اتقوا الله في مصر..

جميله

عرفتي أدإيه إنتي جميله؟
جيت عشان أمسح دمعتك..
شيلتي عني كل أيامي الحزينه..
عرفتي ليه..
لما يجبوا يكسروني..
بياخدوا قلبك رهينه..
وتبقى المساومه..
يا نرمي كل أدوات المقاومه..
يا إما يغرقوا السفينه؟

يا عم يا بتاع البطاطين

بردانين..

ميتين م الخوف

والبرد بينا بيتسلى..

والشكوى لغير الله مذكله..

يا ترى لسه فيه بطانيه من غزل المحله..

تقدر تغطي جراحنا العريانيين؟

مش شرط صوف

مش مهم الألوان..

ماعدش الشتا يومين ويعدوا..

مبقاش طيب زي زمان..

لا دفاية ستي..

ولا اللمه..

ولا الغنا..

ولا الحواديت..

ولا الدفا اللي كان واصل لحد قفص الكتاكيت..

مفيش ف الشتا غير عفاريت

بتسرق السترم البيوت

وتكسر علينا البيان..
يا عم..
هو انت مش زينا بردان..
ولاً انت كمان
من أصحاب الجلد السميك؟
عارف..
كل بطاطين العالم مش هتدفيك..
طول ما الوطن بردان..

❁ محبتي شاف وطن!

ماحدث شاف وطن؟

وطن..

في عز ماهو بردان..

كان ييفرق ع الدنيا دفا..

محدث شاف وطن؟

كان هنا..

وهنا..

وماعرفش ليه فجأه اختفى..

وطن..

ضربوه بالنار وبالعيشه الضيقه..

هددوه بالحبس..

وبجبل المشتقه.

قربوه م الموت..

اتعلق بالحياه أكثر..

سقوه المر..

دوّر على حبة سكر

وقعت من طرف المعلقه..

محدث شاف وطن؟

صورتك اكبر بكتير م البرواز الصغير..
شوفي كام مرّه لون الأوضه إتغيّر..
وراحتك لسه فيها..

محبتي مكان وطني!

منكم لله..

ورُّطونا في قصه حب
وصحَّيتوا فينا الإحساس..
منكم لله..
ما احنا كنا نسينا خلاص..
ورتبنا أمورنا
على نفس الدنيا..
ونفس الناس..
رتبنا أمورنا..
ع الباب اللي بيزيَّق..
والشارع الضيِّق..
وموتور الميه والعوامه اللي بتعلَّق
وتغرق سطح البيت
لحد ما يحن علينا السباك..
رتبنا أمورنا على هوا المروحه
من يوم ما قفلوا البلكونه
وباعوا الشباك..
رتبنا أمورنا على سلام البيت المكسوره

فلازم نطلع وننزل بالراحه..
رتبنا أمورنا على إن الحق بيزعل
قبلاش نتكلم بصراحه..
منكم لله..
رجعتونا من تاني نفني
ونحس..
بعد ما راح الحس..
وصدقنا إن اللي بيروح مش جاي..
ورتبنا أمورنا على إن الوجد ممكن يسكت
بقرص اسبرين
وكوباية شاي...
منكم لله..
ورطونا في حالة عشق
واحنا إلی بقالنا سنين
بنستخدم قلوبنا ف كل حاجه
ما عدا الحب..
منكم لله..
فكرتونا بمصر
بعد ما كنا نسينا إننا مصريين
ووجعتوا قلوبنا عليكم..

محشای وطن!

وانتم رایجین..
أنا مش عارف..
اتعلمتوا کل ده..
فین.. وازای؟

96 ساعه أجازة..

وانت بتبعد..
ماعرفتش إن كانوا خدوك مني
ولأ ردوك من تاني..
طفل صغير..
ما بيعرفش ينام الليل إلا ف أحضاني..
معقوله كبرت.. كبرت
ووصلت لسن التجنيد؟!
ده انا لسه امبارح باحسب عمرك
وبقول ع اليوم ده لسه بعيد..
أتاريه كان بيقرّب..
قُلتلي يامه..
ده انا رايح الجيش
مش رايح اتغرّب..
شهر ونص.. يعدّوا قوام
من يومها عرفت الصبر
واتعلمت أعد على إيدي الأيام..
إسمريت أكثر ما انت اسمر..

واحلويت أكثر..
 كلك ابوك.. الله يرحمه
 وطولة العمر ليك..
 واللي رزقنا بعد ما مات
 قادر يا بني يحميك..
 لايق فيك الأفول لما اتأيف..
 بقيت أشئي معك لما تشئي
 وأفتح قلبي للنسمه الحلوه
 لما تصييف..
 البطه اللي في الشنطه تاكلها مع زمايلك
 ودي لقمه عشان ف القطر لما تجوع..
 ما عرفش إزاي بتقدر تضحك من قلبك
 وعينيك مليانه دموع!
 ضحكت علي لما بقولك..
 فهمني يعني إيه 96 ساعه أجازة؟
 العيش ده .. مغبور طازه..
 قتلتي يامه..
 عيش إيه وبطة إيه..
 لو تعرفني تعبني شويه من حنية قلبك ف إزازه..
 كان على عيني..

أنا لو أقدر ما اتأخرش..
ورحت..
واتاريك زي الفرحة
إلي بتيجي في العمر مره ومابتكررش..
ورجعت.. عريس
وزمايلك بيزفوك بالعلم
وعلى أد ما كان الألم
على أد ما كانت الفرحة..
لسه كراسه أشعارك في مكانها
كل ما باشتقلك أفتحها...
وامشي معاك من أول صفحه لآخر صفحه..
دلوقتي بس عرفت يا إبنني
ليه لما كتبنا على الدبابه
الشعب يريد إسقاط النظام..
ماحدش قدر يمسخها...

نور الطريقه

أنا كنت بنام على نور الطريقه
اللي قصاد أوضتي..
ومن يوم ما قالتلي بحبك
بقيت اطفيه..
وأنام..
وانا مش خايف م العتمه..
ولا شايل هم الوقت ازاي هيفوت..
الأمان يا حبيتي..
مش عساكر في الشوارع
أو غفر تحت البيوت..

مين قال انك فقيره؟

بتفهم في الفلاحه..
وفي الطب..
وفي القانون..
والعدل كلمه بصراحه
والعشق لحظه جنون..
مين قال إنك فقيره
مين قال إنك محتاجه..
وانتي الدنيا الجميله
الي اديتني كل حاجه..
آدي قلبي فتشيه
ماخدتش الغريه حاجه..
وكفايه انك عايشه فيه
ودي أهم حاجه..
عرفتي ليه بحبك..
وعرفتي ليه بتوحشيني
لما السفر يطول؟
طب والله العظيم ما قايل
غير لما تقولي قول...

موظف عام

مبتلعش الكلمه كده بسهولة
غير وانتى معايا..
وبقيّة الأيام..
أنا في الدنيا موظف عام..
من أول يوم في الشهر مفلّس
ومفیش جوايا..
غير زحمه ودوشه وأي كلام..
أشرب قهوتي ع النوته
واسمع نفس الحدوته ميت مره
واضحك من بره..
وأنام..
ويوم ما صحيت فايق..
داري بروحي..
فاتح قلبي..
رافع راسي..
رافض كل أغاني الحزن..
جتني أوامر لازم اطاطي

لعربية أنابيب الغاز..
وارجع ادوّر من تاني على بيت ينفع حضن
ألاقي كل بيوتنا إزاز..

معقول الرصاصه اللي ضربتني بيها
تبقى احزن عليّ منك..
أمانه عليك..
لو شُفتني بنزف..
سلمني لأقرب قلب
لسه بيعشق مصر
سلمني وامشي.. ومتخافشي
لو سألوني فـ محضر رسمي
هقول..
الي ضربني بالنار مجهول..
علشان عمره ما كان مصري..

علبة الألوان

مفیش فی علبة الألوان
ولا لون واضح..
لا الأسود دائماً حزين
ولا الأبيض بقى يعرف يسامح...
بتقابل الألوان مع بعضها
لكنها بتفترق
أول ما بتنتهي المصالح..
وينفس الملامح
تفضل الألوان موجوده..
بتعيد نفس الحكاياه
على نفس المساحه المحدوده..
لا ده لون الأمان
ولا ده لمسة حنان
ولا ده الدفا
اللي قادر يزيع البروده.
يااااه..
مفیش لون فضل

زي ما عرفناه.
من يوم ما البحر اختفى
واللون الأزرق تاه..
لا الأصفر هو الحريف
ولا الأخضر
يعني الحياه..
ورغم إن كل الألوان مؤمنه
لكنها مصممه
ترسم الحاكم
على انه إله..
أستغفر الله
أستغفر الله
أستغفر الله..

صندوق الحزن

ناس ترمي الحب للحمام
وناس تدبحه..
وناس تروح مع الأيام
ننساها وتنسانا..
وناس تكمل معانا..
زي النسيم..
يطبطب علينا.. في عز ما احنا بنجرحه..
أنا ف قلبي شاعر
إن يوم سمعت منه كلام..
أرجوك
ما تطلبش مني أشرحه..
بييجي يقول الكلمتين ويروح لحاله
والشاعر
لا تاخذ منه نصيحه
ولا تنصحه..
أنا رميت صندوق الحزن في البحر البعيد
وافتكرت افي بكده بقيت سعيد

رجعت لاقيته لسه ف مطر حه ..
حدفته من فوق الجبل ..
طلعلي تاني ..
ولعت فيه .. بص لي وضحك
وقالي ..
قبل ما تبطلوا حزن ..
اتعلموا ازاي تفرحوا ..

النيل بيتحرق..

كأننا في القطب الشمالي..
والدنيا مغرب على طول..
يرد حالك على حالي..
أقول أنا..
ولاً انت تقول؟
عارف..
إحنا أكثر شعب ف الدنيا اتطعم
ومع ذلك.. كلنا مرضى..
معقول الأمل اللي اتولد امبارح
مات النهارده؟!
استمتع بالفوضى..
كسر إزاز المدرسه المتكسر..
ضلّم شارع..
طول عمره كان بيعلم ينور..
واقطع طريق..
وقولي..
لو النيل اتحرق..
مين راح يطفى الحريق؟

لما تغيبني

أنا بتلخبط بين السكر والملح
وأدور ف الدواليب على حبة فرح..
ومَلَقِيش..
لما تغيبني..

أنا والبيت بتتوه من بعض
وبابص فِ وشه مايعرفنيش..
ويخاف م القطه لما تنونو
ومن صوت الريح
اللي بيهرب من بين الشيش..
لما تغيبني

كل الحاجات الحلوه يا حبيبتني
بترفض تعيش..
بيني وبينك..
لما تغيبني..
أنا بَخْتاس..

بنسى العناوين
وأسامي الناس..

باكل..
واشرب..
واضحك..
واكتب..
لكن كده.. من غير إحساس
وانسى القهوه تفورع النار
ويروح الطعم..
ويضيع الوش..
لما تغيب..
كل المرايات يا حبيبتى بتكذب
وتغش..
لما تغيب
أنا عن روعي بغيب..
ويحس ان النفس اللي ف صدري
غريب..
أصل الدنيا يا حبيبتى
مش على طول بتروح وتجيّب.
قلوب طيبه .. زيك كده
أرجوكي..
خليكي قريبه
حتى لما تغيب..
...

مَتَقْلَقِيش...

الحاجات الحلوه يا حبيتي
غصب عننا بتعيش..
متقلقيش..
تضرب.. تقلب
أصلنا الطيب ف الآخر بيغلب..
وتبقي انتي..
حكاية العشق..
الي ما بتنتهيش..
متقلقيش..
هو انتي يا حبيتي مجرد سكن..
ولاً جواز سفر
ولاً حنة أرض فاضيه مرميه جنب شط
وسموها وطن؟
والله لو ضهرك الغالي انكسر
الدنيا كلها راح تدفع التمن..
وبرضه مايكفّيش..
متقلقيش..

﴿ مصداق شان وطن! ﴾

وان شفتي جاهل..
عامل مناضل..
ما تخفّيش..
عمرک زرقي بلد
لا فيها رشوه ولا بقشيش؟
عمرک دخلتي مقبره
ما شفتي فيها شاهد؟
إحنا أول أمه قالت للدنيا
إن ربنا واحد..
وحماية القلوب
لا محتاجه عسكري
ولا شاویش..

مش کل عین شایفه..
یبقی فیها ضی..
ولا کل قلب عایش
یبقی لسه حی..
.

محشّ شاق وطوع!

هتلف تاني

ورمضان هيحي ف الشتا
وتشتاق تحس بالعطش..
هتلف تاني
وتعجبك الجزمه الجلد الضيقه
وتشترىها
وتعورك..
وهنصبرك بكلمتين..
بكره هاتوسع نمرتين..
بس لما تمشي فيها
مشوار طويل..
وتلف تاني
وتصحى م الحلم الجميل
هتلف تاني
والعيد يوافق يوم ثلاث..
ولثّن عمرك ما اتعلمت أبداً
م اللي فات
هتعدّي ع الحفره القديمه اللي ف طريق المدرسه

وتنسى وتقع
هتلف تاني
وتجرحك نفس الحاجات
وتشتكي من نفس الوجع..

البيت القديم

أنا خدت قلبي ورحت بعيد..
فاكر إني بكده أبقى ريجته..
دبل مني..
رجعت أططب عليه
من جهلي جرحته..
سألته مالك؟
قال..
هربت منه..
مقدرتش استحمل صراحته..
عارف..
فكرني الميدان بيتنا القديم
وأمي موجوده كان بيان
أكبر كثير من مساحته..
ولما راحت
فضل البيت يضيق..
يضيق..
لحد ما أصبح مفيش..

كل الطرق فيها نقط للخروج م السباق..
فيها استراحه للُّقا..
ومحطه لازم عندها يحصل فراق..

محش مشاق وطع!

نزّل إزازك..

طريق دائري بيلف حوالين نفسه

ويلفنا بالملل..

لوحات إرشاديه ممسوحه

وعجل بيجري ورا عجل..

نزّل إزازك..

عايز أسألك ..

هي نزلة الأمل..

فاتت..

ولا هيّ اللي جايه؟

يفتح النور العالي ف عينيا

عشان يخطف اللي باقي فيها من ضي..

طريق دائري..

اللي رايح فيه

شبه اللي جاي..

شوية أمل

جرّبوا القسوه..
والبلطجه..
والمجرمين..
وكل ما يحرقوا الأرض
بيطلع الياسمين..
جربوا السيف
والنار والطبنجه..
ولسه في الناي نفّس
ولسه بتغني الكمنجه..

لازم تسمعني

بکلمک من مصر..
مصر يا سيدي مصر..
مصر يا عم مصر..
مصر بالصناد..
مصر کل يوم مزاد..
مصر بنات وولاد..
بتسرق أحلامهم..
مصر أصحاب المعاشات..
والبهذه ف آخر أيامهم..
ومصر ناس.. کل الي معاهم..
وف قلوبهم ووراهم وقدامهم
مصر..
مصر بالميم..
آه والله العظيم..
بکلمک من مصر..
مصر بالآه..
مصر کل يوم..

يا حدّ راح
يا حدّ تاه..
بكلمك من مصر
إستطعم الإسم كده..
وانت بتنطقه..
أو بتكتبه..
أو حتى لسه بتهجاه..
مصر..
مصر اللي لو يوم تغني من قلبها..
غصب عنك..
لازم تقول الله..

عادي تلاقيني فرحان بغني
كأني عمري ماعرفت حزن..
وعادي تلاقيني سكت خالص
علمني حبك شيء مهم
ماخذنهوش في المدارس
في عز احتياجك للدفا
مابتترميش في أي حزن..

رُحتي فين؟

بتسمعي مزيكا.. ولأ بترسمي؟
ولأ ابتديتي تحلمي..
وقررتي فجأه.. تتمردي ع الرتابه؟
لو كنتي راجعه تكتبي بإحساسك المليون دفا..
أرجوكي..
إوعي تبطلي كتابه..
ولأ انتي قعده بتلعي ف قصاقيص ورق
وشارده بعيد..
ويتسرقك نفس الحاجات..
وتقومي تجري تلحقي الرزالي شاط..
وما تلحقيش؟
ولأ انتي سرحانه ف مفيش..
ولأ انتي واقفه قدام مسأله محيره بتتنا
ليلة امتحان آخر السنه؟
ولا انتي مشغوله بيأ أنا..
وافتكركي تقصري
رجل بنطلوني الطويل؟

ولاً انتي لسه بتحسييها
وعيونك الحلوه بتختفي ورا كوم غسيل؟
ولاً انتي ساييه الدنيا تضرب وتقلب
ومسلمه عقلك..
لرغي الربابه؟

محبتي شاق وطول!

أتحداك..

إنت مصدق إني وحيد..

وان القلب ده بطل يعشق

وان الغنا طالع من راديو ..

مجرد سلك ولبه وساعاتين وحديده؟

فاكر لما حذفلك المنديل تمسح عرقك

وانا واقفه ف آخر الصف بعيدة؟

يومها الناس عرفت إني بحبك

من غير ما انطق كلمه ..

أتحداك..

تعرف توصف ربع الإحساس ده ف قصيده؟

جاهل..

كل ما اعرفك أكثر..
اكتشف أدإيه أنا كنت جاهل
لا بيعس.. ولا بيعشوف.. ولا بيعدر
واخاف أعلن عن جهلي.. واستكبر
واقول لقلبي انساها
يقول ياريتني كنت اقدر..
أعاند.. استقوي على قلبي
تغرنى قوتي.. أتغتر
وبس تألني ستي
أحس إني من غيرك ضعيف
زي حنة إزاز..
ترميها ع الأرض.. تتكسر
أعاند..
استبدل حنانك بأزاي الميه البلاستيك
أشرب.. اعطش
أشرب.. اتعكر..
أعذري جهلي يا حبيبي

﴿ محبش شان وطن! ﴾

وقوليلي..

فيكي إيه حلو أوي كده..

رغم العتمه دي كلها

قادر ينور؟!

آخر حصتين

واحشني ازوغم المدرسه
آخر حصتين..
في جيبي آخر نفس ف المصروف
وف قلبي كلمتين..
سرق من حصه الرياضه دقيقتين
وكتبتهم ف ضهر كراسه التمارين..
واحشني يوم من دي السنين..
واحشني احلق بقلبي
على كرسي فاضي ف الأتوبيس
وأقولك اتفضلي
ولما يعدي الكمساري يخبط ويقولك ورق
أقوله خلاص...
واحشني امشي ف وسط الزحمة
واقابل ناس...
واحشني انام ف بيعامة تفصيل..
جاكته واسعه..
وكم طويل..

محشش شان وطن!

بزيق ع الأساور والياقه وتلات جيوب
واحشني أحلق ع الزيرو
واكتشف وانا صغير أوي
إن راسي مليانه عيوب..
واحشني ادوب من نظرة عين..
واحشني اغيب.. على أد ما اغيب
وارجع أبصر ف عينيكي ألاقها مليانه بحكايات..
وتبقي معايا على نفس الرحله
ونتقابل صدفه ف طابور الجوازات..
وانسى جواز سفري مع الطابط
وشنطتي على سير بيلف..
واحشني وطن
وانا عندي كل الأمراض
ساعات ما يخذني ف حضنه أخف...

معلقة عسل

مش انتي اللي قلتي
مفيش حاجه تستاهل الزعل ..
وعلى أد ما بتمرّر
من وقت للثاني بتحن ..
وتحلي بقنا بمعلقة عسل ؟
مش انتي اللي قلتي
هّمّا اللي زينا ...
يصحوا م النوم يجروا والدنيا تجري وراهم
عندهم وقت يحزنوا
ولّا حتى يحسوا بالملل ؟
عارفه ..
فيه ناس نزلت الميدان اتصورت
وناس دفعت عمرها ...
وناس اتعوّرت
وناس رجعت على كرسي بعجل ..
والغريبه
هم دول اللي لسه عندهم أمل !

مساحة قلبي..

أنا بخير..
وزي الفل والريحان..
وقلبي اللي كبر فجأه قبل الأوان
لا يبعجز..
ولا ييشيخ..
ولسه طفل زي زمان..
ورغم إنه ف قلب الخطر
لكن حاسس..
بأن الدنيا لسه أمان..
وإيه كمان..
ولو قرئت مني يا حزن
ولو فكرت تثذيني..
منين ما بروح بلاقي حزن
قادر لسه يحميني..
وأقلق ليه..
وأنا أمني اللي كانت لما تدعيلي
تقولِّي روح..

ربنا ما يحوجك للعبد..
 تعيش حر.. كما العصفور
 ولا يدخل في قلبك برد؟
 وأقلق ليه؟
 ولو تقفلها ميه ونور
 تبيع.. تخطف.. تشتري الدستور
 ولو تكسر قلم واتنين
 ولو تسرق رغيغ العيش
 ما عمرك يوم هتعرف فين
 أنا شايل أغاني العشق
 ولو تفهم ف دمع العين
 كنت عرفت إن الألم
 ما يكسر نيش..
 ده بيقربني من روعي
 تروح انت..
 وروحي تعيش..
 وأقلق ليه؟
 مفيش ف القلب غير غنوه
 كلام بيرم وصوت درويش
 وعمرى ما اتوه ف وسط قلوب

محبي شان وطن!

عارفها وهي عرفاني..
ومهما تضيق..
مساحة قلبي أذكر الكون
ما دام النسمه وصلاني..
وأقلق ليه..
وأنا الخطوه اللي وخذاني
تقربني..
ما تبعدنيش؟

نفسی ف عید شبہ قلبک..

بدون أراجوز..
بدون مراجیح..
بدون شیکولاته لما تسیح
تشوه قلبک الطیب..
ونفسی ف عید شبہ قلبک
بدون بلالین
بدون عناوین تودینی لحد مفیش
واعیش ف الهوا عمري
لا انا بعید..
ولا قریب..

الفهرس

5	إهداء.....
9	- مفيش حاجة شيلتها ف قلبك وضاعت
10	- كشك الحراسه
12	- بحب البرد
14	- الله يرحك يا مَبَّث
16	- زراير القميص
17	- بحبك يا قلبي
19	- كل الحكاياه مسافر
20	- ميدان الجيزه
23	- تقاسيم ع العود
25	- زحمة الورق
27	- بضمان محل الإقامة
30	- كيس البرتقان
31	- فضلنا نبص لبعض
32	- لب وسوداني
34	- كلام سخيف
36	- كارت جديد
38	- عايزه انا
40	- رياضه
41	- كنت كل ما اشتري لعبه .. احببها
42	- مصر الي ماخدينهاش في المدرسه
45	- ماتاخدش في بالك
47	- أبويا العزيز
49	- قبل القطر ما يقول توت

محدث شاعر وطن!

- 50 - عايز اكرهك
- 51 - تقيله الأيام ع القلب
- 52 - بطاقة تموين
- 55 - طرايش كلام
- 57 - حصه جغرافيا
- 59 - كيس بلاستيك
- 60 - محضر إثبات حاله
- 63 - المبرور الوحيد إنني أصحى
- 64 - حاجات بسيطه
- 66 - عين الباب السحريه
- 67 - مبسوط
- 68 - شقاوة خريف
- 70 - مزيكنا ناعمه
- 72 - إزاي ؟
- 73 - زمان .. كان لما يدق الباب خير حزين
- 74 - زليطه
- 77 - مفيش كوكو
- 79 - الواد ابني
- 81 - مصاريف المدرسه
- 82 - موسم امتحانات
- 85 - فاكرك كلامك بالبحرف
- 86 - بطاطا بطاطا
- 90 - جرس الباب
- 92 - قلب الياسمين
- 94 - كرسي بلاستيك ع النيل
- 97 - هذا الرقم موجود بالخلفه
- 99 - خايف اطلق بالليل كده زي ما بقلق
- 100 - سياره مفتحه
- 103 - تشابه أسياء
- 105 - إنتهت النشره

- 107 - جميله
- 108 - يا عم يا بتاع البطاطين
- 110 - ما حدش شاف وطن؟
- 111 - صورتك أكبر بكثير م البرواز الصغير
- 112 - منكم لله
- 115 - 96 ساعه أجازة
- 118 - نور الطرقة
- 119 - مين قال انك فقيره؟
- 120 - موظف عام
- 123 - معقول الرصاصه اللي ضربتني بيها تبقى احن علي منك؟
- 124 - علبه الألوان
- 126 - صندوق الحزن
- 128 - النيل بيتحرق
- 129 - لما تغيب
- 131 - متقلقيش
- 133 - مش كل عين شايفه يبقى فيها ضي
- 134 - هتلف تاني
- 136 - البيت القديم
- 137 - كل الطرق فيها نقطه للخروج م السباق
- 138 - نزل إزازك
- 139 - شوية أمل
- 140 - لازم تسمعني
- 143 - عادي تلاقيني فرحان بغني كاني عمري ما عرفت حزن
- 144 - رحتي فين؟
- 146 - أتحدك
- 147 - جاهل
- 149 - آخر حصتين
- 151 - معلقة عسل
- 152 - مساحة قلبي
- 155 - نفسي ف عيد شبه قلبك

أحدث إصدارات

الأستاذ

علي سلامة

■ محدث شاف وطن!



